



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima



tir yimym

TAPAK 7



AAP-i SC dang Haryana nungi tzü supply asiütsü tuyuang ta mepishi

Ukraine-i Russia tesem kar amaktsü Biden-i melar

VOL. XXI ISSUE NO. 229 (ADOK 229) DIMAPUR KÜPTOKNÜ (SATURDAY) AAMI (JUNE) 01, 2024 ₹ 5.00

Nagaland tesem balala nung World No Tobacco Day mongogo

Tseminyu/Dimapur, May 31, 2024 (TYO): Nagaland State Tobacco Control Cell, National Tobacco Control programme-i Hokolbarnü World No Tobacco Day ayongzuka mongogo.

Tseminyu district kubok New Sendenyu Village nung tanü "Protecting children from tobacco industry interference" omen nung ajemdaker iba sentong agiogo.

Sentong nung alakteta jaoker Director (Dental), DH&FW, Dr. Meribeni Odyuo-i o jembidang tobacco industry ajanga tanurtem puatsü mapa balala inyakba lemsatep.

"Tebilemtsü khuret abenba taintem ama asenok teinyaktsü lir aser asen chirnurtem kumzuka ayutsüla. Asenoki asen tanurtem dang moko dak tamajung alibatem ashitsüla, tobacco control policy akangakanga benshitsüla, tobacco

mokdangtsüla aser youth advocacy mapa inyaktsüla" ta Dr. Meribeni-ashi.

Asenoki tobacco free environment kumdaktsütsü atema moko achirtem nem service magütsütsüla. Kaketshirtemia moko nungi pilaa alitsü ayongzükür ta laisa ashi.

Iba sentong nung tetushi süa jaoker EAC (Tsogim), Tseminyu Ruokuosetuo Tetso liasü aser pai moko achiba ya noktangteter ta ashi.

Pai COTPA 2003 laws talisa section 6 a& b. Juvenile justice act section 77 aser FSSAI 2011 act indang lemsatep.

Ruokuosetuo Tetso-isa e-cigarette mamshitsü metetdaksü. Asenoki tobacco free environment ka kumdaktsütsüla aser nungdakra yimtsüngtemi aibenelertem merenshitsüla, ta Ruokuosetuo Tetso-isa ashi.

Joint Director & State Nodal Officer (NTCP) H&FW, Dr. Arenla Walling-i Tobacco Free village aser School campaign indang jembi.

Dr. Arenla-i New Sendenyu Village dang Tobacco Free Village aser GPS New Sendenyu o Binzen Pre School dang Tobacco Free Schools ta sangoktsü.

Iba sentong nung Mothers Association, New Sendenyu Village president Shewsenle Kent-i 'tobacco free status' atema mapa inyaka aruba osang lemsatep.

Mothers Association-i 2017 nung talaab aser yi noktang. 2018 election mapang ki ajak aser garitem mita ao. 2022 nung arogoi yaria lokti senden nung bangzüngtem renem aser 2024 nung orientation ka agiba sülen 'tobacco free village' sangdong lemtet ta Shewsenle Kent-isa ashi.

District Tobacco Cell, Department of Health & Family Welfare Dimapur-i Government Higher Secondary School Chumoukedima kaketshirtem den World No Tobacco Day 2024 mongogo.

Chakhro Public Organization Hall, Chumoukedima nung

ayonga agiba sentong nung Additional Deputy Commissioner of Police, Chumoukedima Veni Vese-i alakteta jaoker ka ama shilem agi.

Moko achiba ya wara ka ama lir kechiyong iba ajanga nisung million aika tepseter aser shirangdaksür. Moko achiba ajanga taküm raksaba dang masü saka rongsenketzüng aser lokti asoshi khuret agütsür ta Veni Vese-i ashi.

Portuguese nungeri Putu 17 buba nung mezüng Gujarat kubok tesem kar nung moko bener aru. Iba mapang high-class society nisungtemi dang stimulant ka ama amshi saka tanübo India nung moko ya teküpoktiba jenjang nung alirtemi kanga bulua achir aser alima nung moko teimtiba achir tanabuba linük lir, ta pai metetdaksü.

"Nagaland nunga tanur aikati moko kanga achiba osang angashidang aoksar. Tanurtem arishi küm 13 nungi 15 tsüngda asüdang moko chibar anungji asenoki kaketshir nem tesayuba agütsütsüla. Asenoki moko achiba azüoktsüla aser COTPA Act 2003 shitak benshitsüla" ta Veni Vese-isa metetdaksü.

HSLC aser HSSLC tatidang nung GHSS Chumoukedima-i takok tajungba anguba atema paisa tenüngsang agütsü.

Iba sentong nung District Hospital Dimapur nungi Dr Japheth Yephthomi-i Nagaland nung moko achiba indang presentation ka sayudang "India nung highest tobacco consumer tasembuba state ji Nagaland lir" ta ashi.

Sentong nung tetushi süa jaoker Retired Director (Dental) H&FW Nagaland Dr. Chekroshuyi Tetseo-ia kaketshirtem dang tobacco industry indang osang lemsatep.

Christian Institute of Health Sciences and Research (CIHSR) Hospital nunga World No Tobacco Day ayongzuka among.

Iba sentong nung o jembirtemji MS CIHSR & ENT Specialist Dr. Clement Momin den Oncologist doctor tem Dr. Shirley, Dr. Khurutsozo, Dr. Vishala aser Dr Abigail Resu nunger liasü.

Sentong nung Hope Academy, Shemrock School, Grace Christian Mission School, Highland Hall HS School aser Great Commission School nungi kaketshirtem aden.

SEC-i Chief Secretary den senden amen

Dimapur, May 31, 2024 (TYO): Nagaland nung Municipal and Town Council elections 2024 tiptema agitsü atema State Election Commission aser state sorkari maparen inyaka arudar.

Iba dak sendakba nung Chief Secretary-i anir Home Commissioner, Commissioner & Secretary, Municipal Affairs Department, State Nodal Officer for State Election Commission & Police Nodal Officer nunger den senden ka menogo.

Senden nung Chief Secretary-i election tiptema agitsü atema Commission aser State Government Officers tsüngda amalitep alitsü nenshia metetdaksü. State Election Commissioner-

ia senden nung adenertem dang Commission ajanga mapa balala inyaka aruba osang lemsatep.

Police Nodal Officer-ia security maparen inyakba osang metetdaksü aser Home Commissioner-i akokba tashi security personnel mapa lemsütsüba nung yariteptsü nangzük.

"Election schedule ama mapatem inyaka arudar anungji sendaktepa alir ajaki election metembang tashi mapa shitak inyaktsü mepishir. Asenok ajaki iba ken o Supreme Court of India nem osang agütsütsü aliba mamadokli" ta State Election Commissioner-isa senden nung adenertem dang nenshi.

ULB candidate Mrs. Moala Pongen atema sarasadem

Mokokchung, 31st May (TYO): Mokokchung Municipal kubok ward No. 13, Penli Ward, Mokokchung nungi aruya aliba ULB election 33% Women Reservation nung tokteptsü alila Moala Pongen er kidang 31st May, 2024 nü sarasadem sentong ka agiogo.

Moalai iba sentong nung jembidang, nübur tenzüksü tejangraba tulu nung la election nung noktaker, ta metetdaksü.

La ya sarkar tenzüka mapa nung küm talangka tenzüker pension aluogo. La ya Arogo nunga Sunday School tesayur aser Watsü Mungdang nunga shilem agia aruba nübu ka lir. La Longjang tsür aser kinungbuji Changki nunger Imliyangar.

"Tanü asen Mokokchung town aser ward nung teinyaktsü wadang jenti lir, anungji, kü nükjidongji asen ward nung kechi

maparensa adokdir, ajak nung yimden aser kiyong nung aliba nüburtem den shisa lemsa-a inyaka aotsü, aser talisa ano lanurtem asoshi maparen balala inyaktsü temulungtetba lir", ta lai ashi.

"Nenoki ni shim nung dang kü nükjidongtemji tonga inyaktsü, anungji, nenok tamang sarasadem den shisatsü agi akokba tashi yaritepdaktsünür, aser ajak dak alia nenok senti vote ji kü nem agütsüdaktsünür", ta laisa tesentepertem dang mepishia metetdaksü.

Iba sentong nung Penli Ward yimden, Penli Watsü Telen, Ward nung yimtsüyimbu kar den candidate-lar kinunger anati shilem agia liasü. Yimkhiung Baptist Chruch, Mokokchung Associate Pastor (W), Asola-i candidate atema mejeta sarasadem ka agitsü.

Bihar nung heatstroke ajanga 10 IR police 2 asü

Dimapur, May 31, 2024 (TYO): Bihar nung Lok Sabha election atema election duty aoba 10 IRB Nagaland züngsem ana Rohtas district nung süogo.

Osang angazükba agi tena ya anü kanga tsüka apoba ajanga heatstroke asüba liasü.

Tanü nikongdang 2:20 ako meta Narayan Medical College and Hospital Jamuhar nung 10 IRB Hav. A. Nikiye Sumi asü ta

Commandant Lakha Koza-i metetdaksü.

Taonung Nagaland Deputy Chief Minister Y. Patton-i Bihar nung NAP (IR) ana asüba atema mangyimba metetdaksüogo.

May 26 nü constable Akangluba Ao aser May 31 nü Hav. Nikiye Sumi na election duty mapang heatstroke ajanga asüba osang angashi temulung raksar ta Y Patton-i ashi.

Tenati mapa bendanga agüja inyakba aser linük asoshi taküm tenlaba teti bilemtettsü. Tasür kibongtem den asükhü lemsateper aser tena tanüla teti atema anisüngzük angutsü sarasadem ta paisa metetdaksüogo.

Maneni Bihar nung NAP (IR) 4 tashi heatstroke sür mozü kidang anepaludar ta 10 IRB Commandant-isa ashi.



All Ward Union Mokokchung Town pur menden melentepba sentong ka AWUMT office building nung meraketa agir külen, tanenertem (noktaka alir) aser tasen shimertem (mena alir) külemi tangokba noksa nung angur. Iba sentong nung Artang Baptist Arogo Pastor, Rev. Dr. Bendang Lkr-i temoatsü meshia sarasademtsü. Sentong nung menden toktsürtem, agizükertem aser AWUMT presidential council züngsem karia shilem agia tepela o den tayongzükba o balala jembi. AWUMT 2024-2027 kümsük asoshi shimmer ketdangpurtem yamai alitsü: 1. Tir: Lemasashi (Alempang), 2. Tatong Tir: T. Ati Mongro (Artang), 3. Tongti Zülur: Lanuwapang (Majakong), 4. Repsem Zülur: Imlinungsang (Lijaba Lijen), 5. Senotsü Zülur: M Yanger Lkr (Dilong), 6. Kimen: R. Longritemjen Ao (Aongza)

Gariphema 'Best Performing Tobacco Free Village' sangdongogo

Dimapur, Monupii/May 31 (TYO): District Tobacco Control Cell ajanga May 31, 2024 nü TM Government Hr. Secondary School Kohima nung World No Tobacco Day anogomung nungtem nung sentong ka ayongzüka agidang Kohiam district kübok Garipema yimtsüngta Best Performing Tobacco Free Village sangdonga liasü.

Moko achiba ajanga nisung temang nung timtem agütsüba indang awareness prokshitsü aser nüburtem dang miim aliba aser temesepba aliba chiyongtsü nungi pila alitsü ajungshia alima nung küm shia World No Tobacco Day ya May 31 nü ayongzüka amunger.

Iba sentong nung tesemdanger tongti ka ama jembidang Additional Director, Higher Education, Dr. K. Nishena Nekha-i moko achiba nung timtem aliba indang

lemsatep aser moko achiba nungi temang nung timtem agütsüba aser moko machitsü atema awareness agütsütsü nenshia ashi.

Pai kaketshirtem dang osangkaket aser magazine tem azüngtsü ajungshi aser ibaji ajanga tanü alima koloni aor aji metettsü, ta ashi. Paisa kaketshirtem dang moko achiba nungi jenbua alitsü asoshi tanur asüandang nungi yimya tajung angazütsü ajungshia liasü.

Iba sentong nung Senior Resident BDS, MDS, Nagaland Institute of Medical Science & Research, Dr. Thungbeni Ngullie-i 'Protecting Children from tobacco industry interference' onük nung ajemdaker jembia liasü.

Kobamala yimya nung südir süaka moko achiba ya asen temang atema kanga majung lir, aser iba yagi cancer aser danga tashidak adokdaksür, ta lai ashi.

'Active smoking' ajanga nisung kangshia asür, aser 'passive smoking' koba dang secondhand smoking ta ajar, iba ya kasa majung lir, ta ashi.

Moko achiba, menemba mesüra mejakba ya nü temang asoshi timtem tulu lir. Moko ya atoktsü kanga tasak lir aser mapang talangka achiba ajanga temulungjang tashidak, tango junga mesashitba timtem, cancer aser danga chronic tashidak adokdaksür, ta lai ashi.

Kasa sentong nungsa World No Tobacco Day 2024 nungtem nung essay zülutepba indang osang sangdonga liasü, kong GHS Forest Colony nungi Class 9 nung azünger Neha Devi-i mezüngbuba jenjang ngutet, Dr. N Kire GHS nungi Class 10 nung azünger Khriezobeinuo Chatsu-i tanabuba jenjang aser TM GHSS nungi Class 10 nung azünger Savellii Ringa-i tasembuba jenjang nguteta liasü.

Mokokchung nung World No Tobacco Day amung



Dimapur, Monupii/May 31 (TYO): Mokokchung District Tobacco Control Cell ajanga May 31, 2024 nü Straightway Hr. Secondary School, Mokokchung nung "Protecting Children from Tobacco Industry Interference" omen kübok World No Tobacco Day munga liasü.

Iba sentong nung o jembir Nukshiwati, District Consultant NTCP ajanga ashiba agi, moko ajanga nüburtem temang, nüburtem aser libajen nung

timtem agütsüba indang awareness prokshitsü mechi World No Tobacco Day ya amunger.

Cancer tashidak shilem 25 moko ajanga adokdaksür aser küm shia moko ajanga nisung million 8 dak tema tepseter aser second pezü nung nisung ka moko ajanga tepseter, ta ashi.

Moko yangluba industry ajanga lanurtem atsür arutsü mechi küm shia advertisement balala nung sen billion \$8 shi indoker, ta pai ashi.

Omen nung ajemdaker posters aser essay competition agia liasü. Essay competition nung Tiajungla Pongen (Class 11 A), Temsunenla (Class 11 B) aser Nungshisungla Longkumtsür (Class 12 A) nungeri mezüngbuba, tanabuba aser tasembuba jenjang nguteta liasü.

Posters competition nung Gai Thaw Chaw (Class 8), Imsongmeren Imsong (Class 8) aser Shilumongla (Class 8) nunger temi mezüngbuba, tanabuba aser tasembuba jenjang nguteta liasü. Takok angur nem senpet den kulizüng kaket agüja liasü.

Iba sentong nung kaketshir nem Anti Tobacco Pledge agia liasü.

Iba sentong nung School Captain menden liasü aser Sentila, Principal, Straightway Hr. Secondary School ajanga melepzüng o jembia.

Mongsenyimti süngkümshi nung lokti sendendak moko machitsü

Dimapur, Monupii/May 31 (TYO): ABAM Social Concern ajanga 2016 küm nungi May 31 anogoya "Temesepba Chiyungtsü Mamshitsü Ajungshiba Anogo" munga arudang temesepba chiyungtsü ajanga nisung takum raksatsüba aika angateta arutar.

Tanü ola madoki takum raksatsüba temesepba chiyungtsü rongnung tongti kaji "Moko" ya lir. Moko yagibo tachisang mesüra tachila takum dang raksatsür masü saka anasa alirtem tai maketer aika takum samatsüba den lendong bener arutsür.

Iba lendong angateta India nung 2003 küm "Cigarette and Other Tobacco Product Act" (COTPA) yanglua Section 4 nung lokti alidak moko machitsü temzüng yanglu. Iba

lentong angateta ano India-i koba temzüng yanglua ali aji ajak asoshi tekümzükbala lenmang ta angateta, ABAM Social Concern ajanga 2023 küm nungi May 31 anogo nung asen Aortemi lokti nung moko machitsü temzüng agizüka amshitettsü asoshi Arogotem ajak nung tangatetba agüja ajungsha arutar.

Taküm (2024) ABAM Social Concern ajanga May 31 "Temesepba Chiyungtsü Mamshitsü Ajungshiba Anogo" ayongba nung Mongsenyimti Baptist Arogo, Mongsenyimti Compound Baptist Arogo, aser Mongsenyimti Riongsanger Putu lungjemer COTPA asenok asoshi mokoi agütsüba lentong nungi tekümzükbala anguba mapa ta angateta, tanü nungi Mongsenyimti

süngkümshi nung lokti senden kecha nunga moko machitsü telemtetba agiba sentong ka kanga takok ngua agiogo, ta sangdong ka ajanga ashi.

Anungji, asenok ajaki iba temzüng ya ajak asoshi tongtipang ta angateta Mongsenyimti süngkümshi nung dang masü saka asen Aortemibo lokti senden kecha nunga moko mechi-i awashi tajung amshidi ta ayongzüker, ta Linükyanger Pastor, Mongsenyimti Baptist Arogo ajanga sangdong ka nung ashi.

Mongsenyimti Riongsanger Putu dang, nübur kümzüka ayutsü mangdang tulu nung iba temzüng agizükbala asoshi pelar aser ABAM Social Concern ajanga iba sentong tajung ayongmesoba asoshi pelaba den Tsüngrem tenüng asanger, ta paisa ashi.

Mon nung World No Tobacco Day amung



Dimapur, Monupii/May 31 (TYO): District Tobacco Control Cell (DTCC) National Tobacco Control Programme, Mon District ajanga "Protecting Children from Tobacco Industry Interference" omen nung ajemdaker May 31, 2024 nü Sacred Heart School, Mon nung anogomung munga liasü.

Iba sentong nung tetushi tesemdanger ka ama Deputy Commissioner Mon, Ajit Kumar Verma, IAS dena liasü.

Pai iba sentong nung jembidang, moko nung tajung kecha mali saka nüburtemi amshir, ta ashi.

Alima ya market organization, demand aser supply nem anishidaksür aser nü tangatetba dak keta lir, anungji na asoshi kechi tajung aji shimang, aser tembar shimba kanga tongtipang lir, ta pai ashi.

Paisa kaketshir dang pei tia kanga kumdanga shimtsü aser industrial world nem mashiokdaksütsü ashi aser kulizüng kaket agizüker dang tanü nenoki telemtetba agiba nung bendanga agütsür alitsüla, ta ayongzüka liasü.

Omen nung ajemdaker SMO, District Hospital Mon, Dr. Aman Konyak-i moko ajanga temang nung timtem agütsüba indang jembia liasü.

Cancer shilem 25 moko ajanga adokdaksür, moko ajanga tekolok, temang aser rongsen samadaksür, ta pai ashi.

Lanurtem atsür arutsü atema

digital, social media aser advertisements balala lir, anungji item nungi jenbua alitsüla aser kodanga metendangtsüla, ta ashi.

Anema aliba ya rongsen lir, aser na anema lira nü ket nung ajak lir, ta pai ashi aser kinunger, medemer aser nüburtem dang iba sentong nung anagzükbala osang prokshitsü pai ayongzüka liasü.

Dr. MH. Daniel, Chairman, Sacred Heart School, Mon ajanga sentong nung pela agizükbala o jembidang, temang anema alitsü asoshi temulung agüja aser moko nungi jenbua alitsü asoshi awareness agüja alima nung küm shia World No Tobacco Day ya amunger, ta ashi.

Iba sentong nung Dr. Esther Chophy Ngullie, District Nodal Officer National Tobacco Control Programme, Mon menden liasü aser lai district nung Tobacco Free Homes 53 lir ta ashi.

Taküm World No Tobacco Day nung Mon district kübok school ti nung Tobacco Free School sangdonga liasü.

Iba sentong nung shilem ka ama poster competition ayongzüka liasü aser iba tetoktepba nung mezüngbuba, tanabuba aser tasembuba jenjang nung takok angurtem ya Sangti E Konyak, Class 8 (Christ King School Mon), Pangteih L Konyak, Class 12 (KHSS Mon) aser Hamkai Konyak, Class 5 (Eastwood School Mon) liasü.

Mangkolemba SDPDB senden Lakhuni nung amen

Dimapur, Monupii/May 31 (TYO): Nüburtem dangi sorkar tali anasai bener aotsü mechi ita shia amenba Mangkolemba Sub-Divisional Planning & Development Board (SDPDB) senden May 30, 2024 nü Lakhuni yimdak mena liasü.

Iba senden ya ADC & Vice Chairman SDPDB, Mangkolemba, T. Lankonsen Tsanglao lenisüba kübok mena liasü. Lakhuni nung kilen 120 shi lir aser kibong timba kozü aser rubber lu ayimer.

Yimtsüng nung ao marok aser am tu ama eco-friendly yimya amshiba atema senden nung mendenpubai pelaba lemsatepa liasü.

Nisung shiai pei yari yimya tajung amshiba ajanga plastic maliba libajen ka akumtsü asoshi mera tulu agitsü, ta pai ashi.

Paisa Longnak-Mangkolemba lenmang tang teyangludak aliba indang osang agütsü, koba taküm küm tatemi

renemtsü imlar. Senden nung 29 Jangpetkong Assembly Constituency aser 30 Alongtaki Assembly Constituency nungi elected members temi Local Area Development Program 2024-25 kübok benokba schem tem indang jembir agizüka liasü.

Iba dak sendakba nung Longdikaba nung Dispensary Sub-Centre aser Government Primaru School yanglutsü, Lizo Model village nung Government Primary School yanglutsü aser Alongtaki nung Government High School yanglutsü project tem agizüka liasü.

Nüburtem tenzüksü aser timtem majurutsü mechi department balala dang item project mapang shidak nung renemtsü senden nung mendenpubai ayongzüka liasü.

Iba senden nung Mangkolemba Sub-division kübok heads of offices tem dena liasü.



May 31, 2024 nü World No Tobacco Day anogomong nung Kolkata nung aliba Victoria Memorial kima moko machitsü awareness agüja shilem agirtem kar noksa nung angur.

Centre sorkari state ajak dang an asüba wara mita alitsü tuyuogo

New Delhi, May 31 (Agencies): Centre sorkari state ajak dang an kanga asüba metetra idangyongjisa iba osangji Animal Husbandry Department den lemsatampang; ibaji ajanga dang an asüba wara azioktsü atema inyaktsü, ta metetdaksü.

National Centre for Disease Control (NCDC) aser Department of Animal Husbandry & Dairying nati külem sangdong ka ajanga, 2024 küm state pezü- Andhra Pradesh (Nellore), Maharashtra (Nagpur), Kerala (Alappuzha, Kottayam aser Pathanamthitta districts)

asera Jharkhand (Ranchi) nung aliba an farm tem nung an asüba wara poktetba osang lir, ta metetdaksü.

Parnokisa, "Avian Influenza (H5N1) wara ya menatetba wara ka lir aser nisung dak-a menaloktsütsü akok, anungji iba wara ajema kümdaktsütsü aser nokdangtsü atema mera ajak agi inyaktsüji kanga tongtibang," ta metetdaksü.

Avian Influenza virus wara ya talisa bendanglen nungi aruba ozü ajanga proker aser farm nung metsüba an dak menaloker. Virus tapu anaprongla (HPAI aser LPAI)

ajanga meimchir densema tanga shirurua kongshitsü akok, ta parnokisa külem sangdong ajanga metetdaksü.

2006 küm nungi tenzüka India nunga an farm nung Avian flu pokteter aser ibaji Animal Husbandry and Health Departments (IDSP, NCDC)-i longjemer bushisüngdang.

Centre sorkari states aser Union Territories ajak dang peipei state nung kidang metsüba an aser farm nung metsüba an kanga bulua asüba mita repringtsü aser iba osangji Department of Animal Husbandry nem metetdaksütsü tuyuogo.

AAP-i SC dang Haryana nungi tzü supply asütsü tuyuang ta mepishi

New Delhi, May 31 (Agencies): Tang New Delhi nung tzü agi kanga anüngba mapang nung Delhi nung Aam Aadmi Party (AAP) sorkari Supreme Court dang Haryana state dang tzü supply asütsü atema tuyuang, ta mepishio.

Hokolbarnü Delhi Chief Minister aser AAP tongti lenir, Arvind Kejriwal-i BJP danga, BJP sorkar aliba state ana-Haryana aser Uttar Pradesh na dang ita ka atema Delhi dangi tzü supply asütsü tuyuang, ta mepishi.

Kejriwal-i, tang mapang ya politics asayatsü mapang ka masü, ta metetdaksü.

Tang Delhi nung tzü agi kanga anüngba mapang nung Delhi water minister, Atishi-i Haryana-i Delhi nem tzü magütsüba atema Haryana

aitüsügo. Yimti nung tzü agi kanga anüngba agi Delhi sorkari amajok nung tzü lalushibongertem dang senchi achitsü tuyua lir.

Bodhbarnü Delhi sorkari, pipe amshia gari shidokba aser kidang supply asüba tzü kisüjensüba nung amshira ibaji tzü lalushibongba ama züngshitsü aser aibelenertem dang senchi 2,000 achitsü, ta sangdonga liasü.

Delhi nung tzü tajemtsü agi kanga anüngba atema Hokolbarnü Delhi nung BJP-i AAP sorkar anema longkak aitogo.

Iba dak sendakba nung Kejriwal-i X ajanga, "Longkak aibtaji ajanga tebilemtsü kecha mebenettsü. Ni nisung ajak dang tang mapang ya politics


masayatsü saka ajak longjemer Delhi nüburtem anisüngzükdaktsütsü atema inyaktsü mepishir," ta metetdakja liasü.

Paisa, "BJP-i Haryana aser Uttar Pradesh nung par sorkartem dang ita ka atema Delhi dangi tzü yoktsü mepishira Delhi nung alirtemi BJP dang kanga pelatsü. Tang tali atsükba ya nisung shingai mazüoktettsü. Ajisüaka asenok ajak longjemer inyakra asenoki nüburtem nem anisüngzük agütsütettsü," ta metetdaksü.

Delhi excise policy ochimashi ken o nung Arvind Kejriwal nem interim bail agüja aliba June 1 nü tembanger, anungji pa tanaben jail ketdangsertem matsüngdangi aotsü.



May 31, 2024 nü UN Headquarters, New York nung United Nations Secretary general, António Guterres aser Indian Army Major, Radhika Sen na tangokba noksa nung angur. Radhika Sen nem 'UN Military Gender Advocate of the Year' Award agütsüo.




GOVERNMENT OF NAGALAND
INVESTMENT AND DEVELOPMENT AUTHORITY OF NAGALAND
NAGALAND : KOHIMA

NO.IDAN/INVEST/PROJECTS-74/2023 Dated 31st May 2024

ARE YOU LOOKING FOR FINANCIAL SUPPORT TO PURSUE YOUR HIGHER EDUCATION ?

To support parents and students and to enable candidates to empower themselves in education, the Education and Skilling Loan Facilitation Centre at IDAN office, Capital Convention Centre, Kohima, Nagaland will be facilitating Education loan for students in Nagaland for approved courses leading to Graduate/Post Graduate Degree and P.G Diploma conducted by Colleges/ Universities recognized by the University Grants Commission (UGC), the All India Council for Technical Education (AICTE), the Indian Council for Medical Research(ICMR).

The Centre shall offer assistance on:

1. Availing loan for study in India and abroad through Educational Loan Schemes of Indian Bank Association.
2. All services/assistance offered by IDAN will be free of cost.
3. No collateral for loan up to 7.5 Lakhs against admission letter issued by approved institutions under UGC/AICTE/AIMA etc.
4. Separate process for loans above 7.5 Lakhs based on the institution & country where admission is secured.
5. One year moratorium for repayment after completion of studies in all courses.
6. End to end handholding for loans under the scheme.

Indicative list of courses for education loan:

- 1) Professional courses: Engineering, Medical, Agriculture, Veterinary, Law, Dental, Management, Computer, Paramedical, Nursing etc.
- 2) Computer certificate courses of reputed institutes accredited to Dept. of electronics or institutes affiliated to University.
- 3) Courses conducted by IIM, IIT, IISc, XLRI, NIFT etc.
- 4) Courses like ICWA, CA, CFA ETC.
- 5) REGULAR Degree/Diploma courses like Aeronautical, pilot training, shipping etc., approved by Director General of Civil Aviation/Shipping, if the course is pursued in India. In case the course is pursued abroad, the Institute should be recognized by the competent local aviation/shipping authority.
- 6) Courses offered in India by reputed foreign universities.

N.B. Loans are at the sole discretion of Banks. Admission letter is the only collateral needed for the loans up to 7.5 lakhs. Loan will be released to the concerned educational institutions, post approval by Banks: Tuition fees, Uniform, Lab fee, Hostel fee, Laptop Charges & Two-wheeler for Education Covered Under these loan scheme of Indian Bank association.

For more information : Mail to us at : idan.hrd2023@gmail.com
 Call us at : + 91- 9436030303

India nung tali atsükba agi nisung 60 dak tema süogo

New Delhi, Monupii/May 31 (Agencies): India nung tali atsükba agi tesüiba anogo ishika tsüngda linük tesem balala nung nisung aika süogo.

Brihostibarnü West Rajasthan kübok Ganganagar nung maximum temperature 48.3 degree Celsius liasü.

Odisha kübok Rourkela kija nunga tali atsükba agi nisung ter dak tali süogo. Brihostibarnü Odisha kübok tesem ter nung temperature 44 degrees Celsius dak tali atu. State nung tali atsükba agi anogo ka kija nung nisung 30 dak tema asü aser asürtemji Rourkela kija nunga nisung ter liasü.

Rourkela Government Hospital (RGH) nung director-in-charge, Dr Sudharani Pradhan-i, asürtemji Brihostibar nikongdang 2:00 ako nungi tenzüka ghonda 6 tsüngda asü, ta metetdaksü.

Laisa, "Nisung 8 bo hospital matongdangi süadoker liasü aser tanüngbaji yangi treatment tagidak mapang asü. Tali atsükba agi parnok süadok südi ta bilemer," ta metetdaksü.

"Temang temperature ji 103-104 Fahrenheit shi liasü, aser kanga tali. Iba kuli ajanga parnok asü asütsüa akok," ta lai metetdaksü.

Ajisüaka Pradhan-i, post-mortem agiba ajanga dang kuli

tejangja metettsü, ta ashi.

Brihostibarnü Odisha kübok Sambalpur nunga tali atsükba agi nisung 8 asü, Jharsuguda nung nisung trok aser Balangir nunga nisung trok asü.

India Meteorological Department (IMD)-i, Jharsuguda, Bolangir, Bargarh, Sambalpur, Sonapur, Malkangiri, Sundargarh, Nuapada aser Kandhamal district tem nung kanga tatsük liasü, ta metetdaksü.

Tesüiba ghonda 24 tsüngda Uttar Pradesh nunga tali atsükba agi nisung trok süogo. Tsüingsang-mopung dak sendakba tatalokba balala nung tanur ana densema nisung trok süogo.

Police ketdangsertemi ashiba agi, Brihostibarnü Kaushambi nung tali atsükba agi kanga tantsür ka densema nisung asem asü.

Brihostibarnü Sultanpur nunga arrshi küm 58 tantsür ka asü. Kishori Devi' aser lar jabaso Pradeep naprong train nung temang tamajungba akümba agi railway hospital-i anir oa yari, iba sülen Government Medical College-i anir ao saka Devi bo mekümsükteti asü.

Rajasthan nunga tali atsükba agi tang tashi nung nisung pongu süogo, ta Brihostibarnü Rajasthan sorkari metetdaksü. (Maneni tapak 8 nung...)



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 01, 2024

Telemtetba ka nungdaker

Nagaland ya tanur tamajung sotetba nübener tetsü amai anogo shi kidangi osang tamajung aru manener. Aji oda, tanur tasoba temang tain kuma tetsü mama ayonger aser yongayonga tetsü mama dena ngzüka yonger, kar tema nung aser kar telong nung lia India nem mesüdaktsüba tanurtemji Nagaland-i asoba tanurtem lir. Tereprangtsü aser tangatsübo Nagaland chirtem ya shisa taka aser tokolok tajung dang amato saka bilemba aser reprangba amato masü, pei tsürabur, Nagaland, nem kechi meyipa agütsütsü ta khuretsa bilema Nagaland tajungba yanglutsü meranger masü saka nia Nagaland nungi kechi angutsü ta bilema yimsüsüsürtema yimsü asür aser nübortema ayanger ta asüba limaji Nagaland lir. Aji oda, Nagaland dak mesepdaker yimsü süa süa küm 60 dak tali tain akümdangbo, Nagaland tatar senden nung menden 60 aliba nungi 40 dang kuma aotsüsa mapang tatsüka tsüngda Nagaland yimten yimsüsüba maparen nunga ataloka aruba angur. Ano külen, Nagaland agi tenük masüng, 16 Point Agreement agi akümba Nagaland dang nungibo temaba aser tuluba jenjang ka asoshi taküm ajak bendanga agüja rarartem ka khen, ka khen ta sümar, tanü putu tasenba nung Naga yimten nüchiso masü saka tanishir menden aser alima rongsen bushirtemang kuma oma ama, Naga yimten nüchiso bushiba maparen nung nübörbo mali saka tulur dang, tanidakerbo mali saka ajak tanishir dang kümer, nisung shia telok kaka kuma aoba ya Nagaland tilaba kuma aoba tamaisü ka lir. Asenokibo mereprangtetsü, kechiyong asenoki asen tetsü taso lima rangben ajungtsü bilemer masü saka asen ali kimong, asen ki aser asen gari indangang bilemer. Iba jagi asenoki asen lima kanga ilarepa angur. Asen ki tajung ka sütetra, aji asenoki bilemba yimten nüchiso jenjang atong ama asenoki bilemer. Kasaji alumang ka alitetra, ajiang ano asen asoshibo Naga nüchiso ta bilema Naga yimten indang jembiba purtemji asenok lir. Aji oda, joko Naga yimten nüchiso bushia bushia kibong ajak India government ita sen agi mesütsüsa yanglutetba kibongtemji tangar masü itemjia asenok lir. Joko, ki tajungtiba nung lia gari tajungtiba nung mener oli aruli senzüa Naga yimten nüchiso bushirtemji asenok kumogo. Asenoki mebilemdanger dang ashi, yimten nüchiso bushibaji asenok tetsübu tarendak melii anisüngzüka alitsü asoshi yimten jenjang ka bushiba mapa lir. Anungji asenok tangar yimten kübok ayongayonga anisüngzüka litetra asenok asoshi nüchiso balaka menügdaker. Aji oda, tang tensa yabo Naga yimten nüchiso onük tongtibangba masü saka Naga nung India nem mesüdakja telok paikaya kuma aoba tebilemtsüang tuluba aser tongtibangba kumogo. Ibaibo India den jembitsüla masü. Joko, Nagaland Legislative Assembly nung latetba ozüng aser sentongtem nunga Nagaland anüdoklen aliba district-tem nung alirtemi manidaker asünungji, Nagaland assembly nung tazüngtsü agi tatar züngsem 60 liaka, tatar 40 alidakang Nagaland Legislative Assembly nung latetba ozüng aser sentongtem agiteter asünungji, Nagaland-ji mapa agibo tilaba tilaba kuma odagi. Iba amai atalokyonga aodang asenokibo mangu aser mangashi ama, vote ayoktsü dang aser MLA akümtsü dang bilemsa kazüra, kopi melii Nagaland agi tanük ajatsü. Tang ya Nagaland agi külen tatar 20 alidak aser külen 40 alidak kümer ratateper aser Nagaland nung Naga nung yimten nüchiso bushir telok semer jungdi asür. Iba Nagaland asoshi teti atema telemtetba tajung ka agitsüba mapang lir. Tangbo Naga nung prangpong abener telok metsü-semer liaka mekhateper. Ajisüaka, tang ya asaya tenzüksü whistle apu atar amai lir. Ajungbena kenü tesem ka nung saru dak aketba maparen nung meputep adoker kati injang katokra, aji Naga nung rongnung azü apok tenzüker asütsü. Idangjibo asenoka mapaia moutettsüsa tensa tia kati ia adoktsü. Ibaji matalok dang tanü asenoki nokdangtsüla. Telok ajak ka kuma longjemtsü merang dang telok teimbaang kumadoker, anungji ano tali teimba makümdang tang aliba teloktem ajak sentepdaksür Naga yimten latettsü asoshi Naga nungeri inyakttsüla. Ibaji inyakttsü atema Naga nung shinga mali nuo ?

OLEMSABANG

Molungyimsen-i Arogo otsü dak sendakba nung court-i aotsüsa akümba "Ratet"

Kechiba Arogo otsüren dak sendakba ken o atema ABAM Sanen Luden aser Executive Secretary anema Molungyimsen Senso, Yimden aser Arogoi Mokokchung Civil Court nung case agütsütsüsa aküm, ibaji angatettsü atema tongmelang agi yangi zülur.

Ao Baptist Arogo tenzüka otsü, missionary recordtem aser Ao Baptist Arogo Mungdangi lenla mapang balala nung inyaka aruba aser lemtetba nung ajemdaker Molungyimsen Baptist Arogo kümsük 1872 nungi tenzüka küm 150 abensaba Sesquicentennial 2022 November nung among. Iba jubileemong osang jelia ABAM nem agütsü aser jubilee sentong nung ABAM Executive Secretary dang shilem agitsü mepishia asüngdang. Saka Molungyimsen Baptist Arogo 150 jubilee nung Executive Secretary nem shilem magidaksütsü ABAM Sanen Luden-i lemtet. Iba tetezü Molungyimsen Baptist Arogo-i 150 jubilee 2022 nung amongbaji tai ta asüba lir. Anungji iba lemtetji meyipa reprangshitsü atema Sanen Luden dang kanga mepishia aru, aser parnoki mokokra iba o ya 2021 ABAM küm tatem Mungdang nung angatettepba jembitsümelaang ta jelia asüngdanga zülü. Sanen Luden nungi telangzüba mangu aser 2021 ABAM küm tatem Mungdang agenda nung iba onük maru. Anungji December 18 & 19, 2021 ABAM küm tatem Mungdang nung Molungyimsen Baptist Arogo nungi lennirtemi iba onük angatettepba jembitsü lephsia asüngdang. Aser iba onük ya Mungdang nung angatettepba jembir lemtet tajung ka magitetra onoki tapet sapang bushitsü ta metetdaksü. Idangji Mungdang menden nungi iba onük ya Sanen Luden nung tejembidak lir ta shia Molungyimsen nem jembitsü maangka magütsü. Mungdang senshir külen ABAM Executive Secretary-i December 6, 2021 nung züluba shiti nung Molungyimsen Arogo Sesquicentenary sentong nung ABAM Executive Secretary shilem magidaksütsü Sanen Luden senden November 17, 2021 nung nenshia lemtetba osang yok.

Iba sülen ABAM Sanen Luden-i Yimjung Committee ka shimer Molungyimsen Arogo den tangatettep nung jubileemong dak sendakba ken o lemtettsü nongloksü. Iba Yimjung Committee yagi Molungyimsen nung dang iba ken o atema recordtem kecha menügdaker aser mamshitsü ta ashi. Iba onük ya Molungyimsen Arogo tenzüka aser yimkümsü otsü dak sendakba asünung aki mapang atalokba otsü recordtem mereprangi lemtet shitak agitsüji kanga tasak asütsü ta Yimjung Committee dang shiogo. Ajisaka, Yimjung Committee den Molungyimsen nungeri amalitepba aru, saka Committee mapaji tamakok nung atem.

Yamaji süaka Court-i case kuma maotsü mechi Molungyimsen nungeri ABAM Sanen Luden aser Executive Secretary dang onoki makizüketba onükji reprangshitsü atema 'Legal notice' yok. Saka iba 'legal notice'ji senzüka doktsü.

Tamalen shisemba ama Arogo tenzüka otsü aser Ao Baptist Arogo Mungdang lokti lemtet nung ajemdaker Molungyimsen Baptist Arogo kümsük 150 jubilee (Sesquicentenary) 2022 November nung among. Saka Molungyimsen Arogoi jubileemong tai nung amonger ta tangatetba nung ABAM Sanen Luden iba jubilee nung shilem magitsü lemtet. Iba ken o nung Molungyimsen Arogo aser yimkümsü otsü sendaka lir, aser ibaji Molungyimsen nung rangpen asoshi kanga tongtipang. Anungji ABAM Sanen Luden-i nokdakba asü, mesüra Molungyimsen nung nokdakbaji koba shitak, ibaji jangjatepba lemtet ayutsü kanga rondak tongtipang aküm.

Molungyimsen nungeri makizüketba aser tim masü ta nokdakba onük ABAM nung bilemdanga jembitsü leman kecha makai aküm nung Molungyimsen Arogo otsü atema yimeri nokdakba ya shitak asü tai, ibaji jangjatsü atema Civil Court bushitsüsa akümba dang, aibelener merenshidaksütsü tebilemba nung masü. Aser iba case ya ABAM rangpen anema agütsüba masü, saka ABAM Sanen Luden aser Executive Secretary-i Mungdang tematiba tashi abenba ABAM lokti lemtet den meputepi inyakba anema case agütsüba lir ta Aor Khristantem nem angatetdaksüner.

Iba case nung ABAM Sanen Luden aser Executive Secretary Mokokchung Civil court-i 8.9.2023 anogo jaokba (Summon) osang 27.7.2023 nung metetdaksü. Court-i jaokba ama 8.9.2023 anogo ABAM Sanen Luden aser Executive Secretary tenüng nung parnoki yokba Advocate denogo. Iba anogo ABAM Executive Secretary-i iba ken o ya onok tsüngda tangatettep ka nung tempangtsü leman kar lir, aser ibaji inyakttsü atema ABAM Sanen Luden-i Settlement Committee ka shima lir, anungji onok tsüngda ibaji inyakttsü melaang ta Court dang mepishia züluba shiti agütsü. Ibayongji Molungyimsen nungeria par 'Lawyer' ajanga ibaji molunga lir ta court dang ashi. Ibajagi 8.9.2023 nung court-i telok ana tsüngda tangatettep nung ken o tempanga lemtettsü temelaba agütsü.

Iba sülen ABAM Sanen Luden-i shimba Settlement Committee-pur Molungyimsen-i 8.11.2023 nung arua yimer den meeting amen. Committeepuri tangatettep nung ken o lemtet tajung nung atemtsü atema lenjii arua inyakteptsü yimer dang ajungshia jembir. Parnok o agizüka Molungyimsen nungeria tangatettep nung amalitepba inyakttsü molunga langzük. Iba sülen 20.2.2024 nung Molungyimsen nung teshimtet nübu Impur-i jaoka Settlement Committee den meeting amen. Iba meeting nung tangatettep nung ken o tempangtsü atema Settlement Committee-i yangluba Settlement Proposal ka agütsü. Iba Proposal nung alibaji case agüja aliba ama masü. Ajisaka Settlement Committeepuri yimer dang tangatettep mapa inyakttsü atema anatsülen nungi lenji-i arupttsü kanga nendaka jembiba yong parnoki agütsüba 'Proposal'ji yimer rongnung bilemdanga jembidi ta agizük.

ABAM Settlement Committee-i agütsüba 'Proposal' atema yimeri kanga shisa agitepba jembir külen tangatettep nung ken o tempangnüba agi 'Proposal'ji agizüktsü lemtet aser iba osangji ABAM Settlement Committee dangi Convenor ajanga 25.3.2024 nung yok.

Court nung iba ken o 12.4.2024 nung angatangba mapang Settlement Committee-i agütsüba proposalji Molungyimsen nungeri agizükogo ta court dang ashi. Iba mapang ABAM Sanen Luden aser Executive Secretary tenüng nung lawyer-i iba 'Proposal'ji Sanen Luden nung jembitsü alinung mapang süklöksütsü asüngdang. Ibayongji tanaben iba ken o koda atem, ibaji angatangtsü anogo 14.6.2024 Court-i agütsü. Anungji 14.6.2024 anogo ya Court-i ABAM jaokba (Summon) masü ta angatettsüla. Court-i jaokba (Summon) osangjibo 27.7.2023 nung agütsübaji lir aser Executive Secretary aser ABAM Sanen Ludenji Advocate ajanga Court nung denogo. Anungji Settlement Proposal koba Molungyimsen nungeri agizükogo, ibaji koda inyaktepba atem, aji 14.6.2024 anogo Court nem metetdaksütsü anendaka lir.

Ajioda, ABAM Sanen Luden-i tashi agütsür khuret nongloksüba ama Settlement Committee-i koba Settlement Proposal agütsü aser Molungyimsen nungeri molunga agizükba osang agütsüogo, ibaji ajanga ken o adoka aliba ya yakta tatem kati arutsü sarasadema alidang ABAM Sanen Luden-i Molungyimsen nung dang Court case-ji 'Unconditionally withdraw' asütsü anogo züngzüktsü aji mesüra 'ABAM-i teinyakttsütem shisatanga inyaka aotsü' ta osang aru (shiti dt.10.5.2024 & 15.5.2024). Ibajagi Molungyimsen sensosanger ajak mungdanga jembir Court case-ji 'Unconditionally withdraw' masütsü lemtet, saka Settlement Committee-i Settlement Proposal agütsüba ama iba ken o tatem akümtsü ta tezüluba nung agütsüra (Written assurance) Molungyimsen nungeri Court Case agüja alibaji 'Withdraw' asütsü ta lemtet aser iba osangji ABAM Sanen Luden nem agüja lir.

**Molungyimsen Sensosanger aser Arogo tenüng nung,
Sd/-**

**N. JOSEPH LEMTUR
President, Molungyimsen Senso Mungdang**

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agateta agitsü mepishir**

Texas nung Arogoi ayongzükba sentong nung nisung aika bapti



Taoba hopta Texas kübok Cedal Hill nung aliba Trinity Arogoi hopta piyong 'Summer of Baptisms' agia aruba sülen baptisüdang tangokba noksa nung angur.

May 31, 2024: Texas kübok Cedal Hill nung aliba Trinity Arogoi ayongzükba hopta piyong 'Summer of Baptisms' agia aruba sülen nisung noklang aika baptiogo.

Taoba mapang arasentsür aser tang pastor, Jenny Weaver leniba nung baptiba sentongji agi.

"Taküm March ita nung Kibubai 'taküm küm mei mongpu ya Baptiba mongpu asütsü' ta ashiba ni angashi aser yamaji atalokogo," ta Weaver-i social media ajanga lemsatep.

"Nisung 2,000 aser Tsüngrem tashi agi onok ajuru," ta laisa metetdaksü.

Taküm Easter Sunday anogo nunga Tampa, Florida nung aliba Clearwater Beach nung Weaver-i nisung 200 dak tema baptija liasü; iba jakdang 'Summer of Baptisms' agitsü atema Weaver nem lemezükba liasü.

Taoba ita lai, "Linük tesem ajaklen baptiba sentongtem agidar, kechiyong Tsüngremi mapa tulu inyakdar. Iba ya pelatepsü mapang ka lir, kechiyong alu aruhtsü renema lir," ta metetdakja liasü.

Mother's Day hopta nung Weaver aser la kinüngbu Stephen nati Sarasota, Florida nung aliba Siesta Key Beach nung "Summer of Baptisms"

sentong tenzükba liasü. Kasa mapang nungjisa California, New Jersey, Missouri, Tennessee aser New Zealand nung aliba ayongtem mesüra tzüyümkütem nunga baptiba sentong agia liasü.

Tamalen osangbener den jembidang Weaver-i, sodi mapang hopta tatembanglen baptiba sentong agitsüji Tsüngremi tuyuba mapa ka lir, ta metetdakja liasü.

"Sodi mapang nung nai nisung aika tzüyümkümlen aser ayongküm nung ajurutsü. Anungji nukjidongji tanela samaa alibapurtem bushitsü atema lir. Ibayongji tzüyümkümleni arurtemi Tsüngrem taliba metetnua kidangi meyipa aor," ta lai ashi.

"Yashi onoki baptisübaapur kar dakbo yi menema liasü. Tenük nung nüztü atsünger parnoki 'onoki joko yamai meliner. Onoki Yisu nungdaker' ta lemsatepa liasü," ta lai metetdaksü.

Taoba hopta tatembanglen Texas kübok Cedal Hill nung nisung 2,000 baptiba sülen Weaver-i, "Puti otsü tasen ka yangluogo," ta metetdakja liasü.

"Baptiba sentongtem agidang Tsüngrem tashi agi mapa inyaka liasü. Ni ya kodanga mamatoksü," ta lai Facebook post ka ajanga

metetdaksü.

Tawa interview ka nung jembidang lai, taküm mei mapang piyong lai baptiba sentongtem agitsü tebilemba lir, ta metetdakja liasü.

"Akokba tashi tesem aikati aotsü aser nisung jenti ayongdena baptidaksütsü tebilemba lir. Nisungtemi teimla nungdaker. Nisungtemi temelenshi aginer, anungji parnoki Yisu ajurutsüsa onoki tamang nung inyaksü," ta lai metetdaksü.

"Ni ya taoba mapang arasentsür ka liasü. Ni talidak maliasü. Ni yimti-yimdong nung dang lia jaja, ajisüaka tangbo ni khenyongi melenshiogo, aser ibaji Yisu ajanga dang lir," ta lai metetdaksü.

Jenny Weaver ya taoba mapang arasentsür ka liasü saka tesülen lai Yisu Khrista agizük. La ya Core Group mentorship organization nung tongti lenir. Iba organization-i Easter hopta nung Clearwater Beach nung Easter tekülem sentong ayongzükba agi, aser iba sentong nungji Kibuba benjung agiba den külemi lai nisung 200 dak tema baptija liasü.

Mezüngbo Core Group ya tetsürtem atema mentorship program ka dang liasü saka tangbo iba program nung tebur aser tanurtem-a züngoker.

Syria kübok Khabur Valley nung Khristan nütsüng kanga ajema kümogo

May 31, 2024: Middle East nung rara adokba shia nütsüng kanga ajema aliba Khristantem kanga takoksa angur; yamaji 2011 küm Syria linük nung civil war adokba sülen nungi tenzükba Khristan meyrjang aika talidak makai kümogo aser rara nung Khristantem aika taküm samaogo, ta International Christian Concern (ICC)-i metetdaksü.

Civil war tenzükba sülen nungi Syria kübok Khabur River valley nung aliba Khristantem timtem maneni ajangshia arur aser Khristan nütsüng kanga ajema kümogo. Iba region nung aliba Khristantemji teimbaka 1900s tetenzüklen Ottoman yimli mapang Armenia aser Assyria anema apusodang jena aruba Khristantem nungi jakzükertem lir; ano karbo kidanger Iraq nung rara ajanga

jena arur jenokertem lir.

Civil war tetenzüklen Assad yimsüsüba kübok sorkari longkak aitba nüburtem anema apusodang Khristantem kanga takoksa ngua liasü. Iba mapang nungji Syria tesem balala nung bomb amshia amakdang Tenla ki 18 raksaja liasü.

2012 küm November ita nung Assyria Khristantem yim- Tel Nasri nung Amongnü tekülem sentong agiba mapang nung sorkar indang MiG raraba tayimtsü ka nungi Tenla kidangi bomb poklokja liasü. Iba tatalokba nungji tebur ka asü aser aika yirua liasü. Bomb ajangasa yimdak ki aika poksaja liasü.

2014 küm nungi 2018 küm tashi nung Islamic State group (ISIS) aser Jabhat al-Nusra telok iba tesem jagi arua Khristantem jenti tepset aser Tenla kitem raksatsü; iba sülen

Khristan meyrjang aika jenshia liasü.

Syria kübok Khabur Valley nung Khristan nütsüng 15,000 dak tema liasü saka rara ajanga tangbo Khristan nütsüng noklang ishika dang kümogo.

2019 küm nungi Turkey sepaitemi northeast Syria amakba ajanga Kurds, Arab, Assyria Khristan aser Armenia Khristan, ajak senteper 200,000 dak temai Khabur River valley kübok al-Hasakah yimti toktsür ajen.

Turkey-i maneni anünglen nungi Khabur River valley amakba ajanga Khristantem yimdaki meyipa mouteter. Turkey Tir, Recep Erdogan-i tang mei mongpu nung northern Iraq aser northern Syria amaktsü sangdongogo, aser ibaji ajanga Khristantem kanga takoksa angutsü.



Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail: abamimpur7@yahoo.co.in

Website: www.abamimpur.org

May 31, 2024

ABAM-i Aor ajak Sarasademsü Ayonger

Adianutem ajak den Yisu temeim salem ABAM ajanga lemsateper. 2024 küm tenzükba ita 5 tembangba anogo nung ABAM ajanga iba temepishiba ola sarasadema ayimoktsür. Mapang ajak nung asen timtem, khuret, shisabulu aser nungdakterem atema sarasademsüji arogo/lokti/aser tamanger shia asoshi tongtipang. Iba den Tsüngremer leniba aser temoatsütem asoshi Pa nem tenüngsang agütsütsüji asen teinyaksü. Tsüngremi Naga kin rongnungi Osangtajung meteta kümdaksütsü asoshi mezüngbuba Ao kin nem taochi agütsü. Khrista Yimsü arur küm 152 buba tashi arudang Ao kin ajanga tenyaba mapatem inyaka, meküta aliba kintem dangi Osangtajung ayimsünga yokba nung shilem tajung agia arur. ABAM ya Aor aser Ao arogotem ajak meyong kechiaser iba ya tamangertem lungjemer tentetba Mungdang lir. Iba yongji ajaki ABAM meima tanü tashi ABAM-i tenyaba mapa inyakba nung shilem tajung agia arur. Mapang balala nung tebilemsü khuret balala ajanga ABAM nungshia arubatem lir saka tanü tashi Tsüngremi ABAM teraksatsüba tanela tamajung ajak nungi kümzükba anir aruba atema Tsüngrem tenüng sangdi. Tanü asen tendak ABAM Okadak (court) jaoka lir. Ibai atema Aortem ajak **June 2, 2024 (Deobar), 6:00-7:00 AM**, sarasademsü ayonger. Sarasademsü onüktem aser temetetsütem tongmelang agi lemsateper:

- Tatok Meshidi:** (i) Khrista Yimsü aruba dak sendakba nung tebilemsü balala arudang ABAM-i Laishiba tesayuba nung akanga ammeter tangatetep, tesünep aser yimjung asoshi inyaka arur. Saka meimchir asünung tajungtiba ta bilema jembia inyakdang ABAMi Arogo, lokti aser kija yirudakja lira aser Tsüngrem mepelatsüsa inyaka lira item asoshi tatok meshidi. (ii) Iba ken o ya tasen masü saka küm aika benshia aruba tanü tashi sünepa mekümetetba ka lir. Tsürabur aser taoba lenirtem mapanga kesa ken o ajanga ABAM süngjema melitetsüsa kümdaksüba mapangtem ajuruogo. Tsürabur aser lenir aika iba ken o tebilemsütem indang jembia, tekolok shisatsü timtema arur metembangteti toktsür akümüli tembangogo aser kar tanü tashi arishia lir. Par mapa tajung asoshi peladi saka liyonga arudang ABAM, arogo, lokti aser kijai tajungtiba ta bilema inyaka jembidang aibeleni lira item asoshi tatok meshidi.
- Court Case:** ABAM dangi Court Case 3 (asem) arua lir. (i) The Molungyimsen Village, Represented by the President, Molungyimsen Senso Mungdang, The Molungyimsen Village Council, Represented by its Chairman, Molungyimsen Village, The Molungyimsen Baptist Arogo, Represented by its Secretary, nungi. (ii) Shri. S.T. Yapang L.K.R, Permanent resident of Changtongya Village, Shri. Odi Jamir, Permanent resident of Unger Village, Shri. Longbok Lemtur, Permanent resident of Salulamang, nungi. (iii) S.T. Yapang Lkr & Ors, nungi. Tebilemsütem mesüngjemteti akümdang lenmang balala bushia sünepa akümtsü asoshi inyakteper. Kati ka aitsütepba tanela nung masü saka ya Aor ajak asoshi khuret ta angateta iba ama mapang ka nung Tsüngremi mokoroi asenok nem shisatsü agütsütsü aser iba ya Aor asoshi temoatsüba mapang kümdakjang ta Tsüngrem dang mepidi.
- ABAM Inti Mungdang:** Küm aika bener aruba tebilemsü atema maneni shisatsü bushitepa lemsatepsü atema ABAM Inti Rongdak Senden **June 4, 2024**, nung ayonga lir. Ibai shinga anema masü saka iba ama mesüngjemteta tensa mapang ka nung külemi sentepa sarasadema Tsüngremer shisatsü bushia nungdakterem jembitsü tangatetba nung ayonger. Tsüngrem tatenba meteta, Pai agütsüba tashi, shisatsü aser tangatetba nung Tsüngrem sentong angateta iba ken o süngjema kümdakjang ta Tsüngrem dang taochi meshidi.
- Tsüngrem Taochi aser Tatasaba asoshi mepidi:** Meimchiri mekümdangi jembidang, inyakdang aser telemtetba balala agidang Tsüngrem mepelatsüsa inyakteter. Iba ken o indang jembidang ajaki Tsüngrem tsüba jembitsü taochi aser tangatetba asoshi mepidi. Tatasaba Tsüngremi atasar saka asenoki Pa sentong anema angateter sünung mangatet ama alidang Tsüngremer terasaba aruadokra aser Pa taochi süitemadokra ayatai asütsü. Aseni aibelenaka Tsüngremi taochi agi atasatsü aser asenoki asen aibelenbatem meteta arutsü yariang ta mepidi.
- Tesünep aser Yimjung atema:** Shibaibo mepelatepi liner? Ajaki tesünep aser yimjung nung pelatepba Tsüngrem mapatem inyaka liner. Akümüli nung tatsüka arishia alidang ajaki tepela tanela tener Tsüngrem peladakja liner. Iba ama mapang ka tenjidang tamanger shia mulungjang nung taremzük, ajemalu, tatok agütsütepba, kati ka angatetba, amalitep aser yimjung tanela lidakjang ta sarasademdi.

TEMETETSÜTEM

- Iba sarasadem mapang tenla kidang mesüra pei kidang agitsü Sannükeri pei arogo sasep nung telemtetba agia nüburtem nem tetuyuba agüjangma.
- Amangbapurtem ajaki iba sarasadem ya kanga reta agitsü mepishir. Iba tebilemsü atema na tamang nüktzü ayimba amajok masütsü.
- Tenla kidang mesüra pei kidang ajemalua ali nung temokok agi tsükiter iba khuret atema sarasademdang Tsüngremi mapa inyaksü. (4) Chirnurtem ajak den iba tebilemsü tsüraburi lemsatepba angatetdakjang aser kidang alir ajakali nung apudaker nüktzü yima sarasademsü mepishir. Adianutem, Tsüngrem taochi ajanga asen Ao kin nem mezüngbuba Khrista Yimsü agizükba amangtsü taochi agütsü saka iba mechi nung asenokbo yamai mepelatepi küm paika ya alitsü no? ta khuret süa bilemde. Saka Tsüngrem tashi agi iba tebilemsü süngjema kümdaksütsü ta tamang nung bendanga agüja iba sarasadem nung shilem agidi.

"Asenoki pai mulungba amato langka meshira, pai asenok dang angar, ya pa tsütsü asenoki anguba temulung lemtetba lir." (1 Yohan 5:14)

Tsüngremi moajangma.

Rev. Dr. Mar Pongener
Executive Secretary, ABAM

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Süpong

- (n) sü tepong, jongpong (male mithun)
- * Süpong ya jenjang aketba shiruru ka lir.

Süpu

- (n) sü tepui, kecha sentsü den memeyoktep (bluish cloth)
- * Akhi tsürabur mapangbo peisasa süpu sü taka abena liasü.

OLONG PAITEP # 6804

1		2		3			4		
5									
						6			7
		8							
		9							10
	11								12
			13		14	15			
16									
					17				
18									

TIPIEN

- 3. Tarutsü nükla - 7
- 5. Tzüma nung senzüba - 5
- 6. O jembibatem - 5
- 8. Yong agi atakba oset ka- 4
- 9. Tembar - 7
- 14. Yimya yimpong - 4
- 16. Ajak dak atongba wara- 5
- 17. Tamangertermi tentetba- 5
- 18. Yaritepba ocet - 7

LANGTSÜNGLEN

- 1. Zülüjang - 5
- 2. Telemsa - 6
- 3. Tekong sobutsü - 4
- 4. Komo bang - 4
- 7. Rong tapu ka - 3
- 10. Teimba aküm - 6
- 11. Shitak masü - 3
- 12. Jang ayuba oset - 5
- 13. Süngdong-lidong alidak - 4
- 15. Chiyongtsü tali chir joko mechinü - 4

OLONG PAITEP # 6803 TELANGZÜBA

TIPIEN:

- 2. Bangsemo, 6. Tiptem, 8. Jen,
- 9. Talilla, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN:

- 1. Yipten, 3. Nüja, 4. Sangro,
- 5. Milen, 7. Tulu, 10. Laza, 11. Aben,
- 12. Tiyong, 13. Ajizük, 14. Aitsü,
- 15. Tasa, 16. Aina.

NAI-A YA METETTER MA



- 1. Ostrich tekolok dangbo tenük ang tuluba
- 2. Starfish dakbo tekolok mali.
- 3. Polar region nung aliba shirem yabo ajak abelen kayim dang lir.
- 4. Danü natzü ya tesangwa tanak nungbo prangshia angur.

Manipur aser Assam nung tesem aika tzü agi metsüngbanga lir



Imphal nung tzümetsüng tensa azüoktsü atema Hokolbarnü Mongshangei Maning Leikai area nungi Waisel Maril ta ajaba water channel merüktetba angur.

Imphal/Guwahati, May 31, 2024 (Agencies): Cyclone Remal ajanga Manipur nung tzünglu kanga arur aser Jiri River nung tzümetsüng ajanga ki 4 pongdok aser ki 250 metsüngbanga lir.

Iba ayong ya Manipur kübok Jiribam district aser Assam kübok Cachar district den arrtsütepa lir.

District kübok tesem balala nung relief camps 6 lapoka lir aser idakji nisungtem jenoka lir.

Hokolbarnü Kamarang Muslim village nung ki 4 tashi

tzümetsüng agi ponger ao. Iba yimtsüng nung ki 95 metsüngbanga lir.

Manipur aser Assam nung Brahmaputra aser Barak dena ayong 6 nung tzümetsüng timtem ajurua lir ta Central Water Commission (CWC)-i ashi.

Neamatighat nung Brahmaputra ayong aser Barak ayong nung tzü mesemi ayimer.

Manipur kübok Chotabekra nung Barak River nung danger level alema tzü ayimer ta

CWC data ajanga ashir.

Assam nung Barak River ajanga Karimganj district aser Cachar district nung tesem aika tzü agi metsüngbanga lir.

Cyclone Remal sülen tzünglu kanga aruba ajanga Assam kübok district 9 nung tzümetsüng tensa kanga mejungi lir aser nisung lakh 9 shi dak kongshiogo.

May 28, 2024 nungi tzenzüka Assam nung tzümetsüng, tzünglu aser yipru ajanga nisung 6 taküm samaogo.

Jowai, Meghalaya nung DC office meketa Section 144 benokogo

Shillong, May 31, 2024 (Agencies): West Jaintia Hills District nung District Magistrate-i Jowai nung aliba DC office temeket nung Criminal Procedure Code (CrPC) nung Section 144 kübok tetuyuba agütsüogo.

Election Strong Room aser Counting Centre nung Electronic Voting Machines (EVMs) aser

Voter Verifiable Paper Audit Trails (VVPATs) yua lir aser iba security atema Section 144 kübok ozüing agütsüogo.

Iba tetuyuba ajanga Jowai nung DC Office meketa metre 100 telongtet nung nisung pungu den teimba adenshitsu memelar.

Ajisüaika iba tenokdangba kübok Central Armed Police Forces (CAPF), DC Office

nung state & district forces, candidates, election agents, counting agents, DC's Office staff, officers, election duty staff aser authorised media personnel madener.

Iba tetuyuba sülen manidakertem Indian Penal Code (IPC) nung Section 188 kübok temerenshi alitsü ta DC-isa metetdaksüogo.

Arunachal Governor-i 56 Infantry Division sepaitem den ajurutep

Itanagar, May 31, 2024 (Agencies): Arunachal Pradesh Governor Parnaik-i Likabali nung 56 Infantry Division semdanga liasü. Iba mapang pai iba temeket nung alirtem yaritsü aser arrtsülen fitness, alertness & vigilance metetdaksü.

Governor Lt. General KT Parnaik (Retd.)-isa Military Station nung 56 Infantry

Division sepaitem den ajurutep sensaksema liasü.

Arunachal Pradesh nung alirtemi armed force kanga akhümstübur aser tushir aser ibaji kümtem süia arudang sepaitemi nübertem den jungtepa aruba ajanga lir ta Governor-i sepaitem dang ashi.

Sepaitemi maneni nübertem ajangzüksü mapatem inyaktüsüla aser Sadbhavana

projects ajak nung nübertem den amalitepa inyaktüsü ayongzükter ta Governor Parnaik-isa ashi.

Sainik Sammelan nung Major General Akaash Johar, 56 Infantry Division Likabali General Officer Commanding (GOC) & Deputy GOC Brigadier SD Upadhyay, VSM nunger den Commanding Officers aser sepaitem aden.

Margherita aser Digboi Excise Circle nungi Excise ketdangsürtemi Bongaon aser Dehing Agbondha mita aodang Dilip Bhadra ta ser nisung ka ket nung yi aika yua aliba apuba sülen agiba noksa angur. of DSE Prashanto Dutta lenisüba kübok Excise team-i I/D liquor 30 litres aser IMFL (Indian Made Foreign Liquor) tapu balala aika apu. Dilip Bhadra ya Dehing Tea Estate, Margherita nung alir aser pa anema ken o ka benokogo.



Taiwan, South China Sea atema US, China ketdangsür senden amen

Singapore, Monupii/May 31 (Agencies): United States aser China indang defence chiefs tem Singapore nung ajurutepa sensaksem aka, koba aiben manguba aser mangashiba maparen ka lir, aser tarutsü nung ano mitkartem tsüngta jembishinü akaba ajanga Taiwan aser South China Sea nung mangatettep adoka aliba maziüokteti makumtsü teimla ka sayur.

Ita 18 nung tejak o tejak jitepa jembishinütsü asoshi Shangri-La Dialogue alitsü anasa Lloyd Austin aser Dong Jun na Hokulbarnep ajurutepa liasü.

Tena tsüngta jembishinü ya luxury hotel ka nung tenzükm kong security forum senden amentsü lir ta ketdangsür temi ashir. April ita video conference ka aliba sülen tang tena ajuruteper.

Linük balala nungi defence chiefs aser ketdangsürtem iba annual forum nung adener, aser küm ishika iba forum ya ajanga US-China tesendaktep nung temelenshi bener arutsür.

Hopta ka tejakdang China-i Taiwan temeket nung military

drills agir US-i yariba asetkong nung Tir William Lai Ching-te inauguration sülen iba asetkong mechi rara adoktsü tekumdangtsü ashiba sülen iba senden ya amener. Beijing-i William Lai ya "dangerous separatist" ka lir ta ashir.

US aser China tsüngta mangatettep adoka aliba nung Beijing-i par litsü ama züngshiba Taiwan ken o ya tongtipangtiba lir.

Asia Pacific nung aser talisa Philippines den defence tsütsü Washington tesendaktep tali tajungba akumba aser parnoki mapang shia Taiwan Strait aser South China Sea nung warships aser fighter jets yokba mechi Beijing kanga mepelar.

Tawa Philippines-i US den joint military exercise tulutiba ayongzüka liasü. April ita military drills nung US intermediate-range missile system ka northern Philippines tsütsüü yokba atema Brehostibarnü China indang defence ministry-i kanga sashia aitsü aser iba ya ajanga region nung rara tenzüksü tensa bener arur ta shia liasü.

Nuclear nok-nü bena aliba

linük ana tsüngta mangatettep madoktsü mechi Tir Joe Biden indang administration aser China tsüngta tesendaktep yanglua Secretary of State Antony Blinken-i taoba ita Beijing aser Shanghai semdanga liasü.

Mitkar o mitkar tsüngta jembishinü tanaben tenzüksü nükjidong nung Blinken-i China semdanga liasü.

US House Speaker Nancy Pelosi-i Taiwan semdanga mechi China-i 2022 küm United States den military communications rakdanga liasü.

Ano US airspace nungi Chinese spy balloon khazüka yokba aser Taiwan tir inyaka alisang Tsai Ing-wen aser Pelosi melensang Kevin McCarthy tsüngta senden amenba aser Taipei nem America-i mitkar teyari agütsüba mechi 2023 küm Washington aser Beijing tsüngta mangatettep tali akum.

China Tir Xi Jinping aser Biden na taoba küm November ita senden ka mena tematiba jenjang nung mitkar tsütsü jembishinü tenzüksütsü mulungtepa liasü.

Ukraine-i Russia tesem kar amaktsü Biden-i melar

Kyiv, Monupii/May 31 (Agencies): Russia litsü telung nung US indang noknü amshitsü tenokdangba agüja aliba Ukraine northeast tsütsü Kharkiv region kumzüka ayuba nung yaritsü mechi United States Tir Joe Biden-i iba tenokdangba salatsüogo.

America-i agütsüba nok-nü amshia Russia nung targets tem amaktsü Ukraine nem US Tir Joe Biden-i temelaba agütsüogo, saka Kharkiv region anasa dang asütsü, ta US ketdangsürtemi ashi.

Tan ita Russia-i asendenshir amakba Kharkiv region indang arütsülen nok-nü amshitsü Kyiv dang melatsü, ta US ketdangsür aikati Brehostibarnü shia liasü.

US-i iba telemtepa agiba ajanga Biden-i Kyiv nem US nok-nü Ukraine arütsü alema oa amshitsü memulungi aliba melenshir aser France aser danga European linük temia Russia telung nung military targets atema Ukraine nem parnok indang nok-nü amshidaktsütsü yimya balala ajanga sayua liasü, koba ajanga Kremlin ketdangsür kanga jashir.

Kyiv nem Kharkiv region den arütsüa aliba military targets amaktsü melatsü, kong Russia-i May 10 nü sülen yimtsüng aika agia nisung meyirijang aika ainshir lir.

"Russian sepaitemi Ukraine dak amakba mesüra amaktsü renema aliba mechi Kharkiv region nung 'counter-fire' atema US-i agütsüba nok-nü Ukraine nem amshidaktsütsü tiri tawa par team nem totuyuba agütsüogo," ta US ketdangsür kati Reuters, AFP aser The Associated Press news agencies dang shia liasü. Iba temelenshi ya online media outlet Politico nung mezüng

sangdonga liasü.

Iba o jembiba mapang Ukraine indang Western allies temi par policy salara timtem tulu alitsü ta Russia Tir Vladimir Putin-i Mongulbarnü shia liasü.

US-i agütsüba nok-nü amshia ozü litsü nung makra Moscow-i Ukraine dak tayang kepzüksü, ta Russian lower house indang defence committee tekolakna, Andrei Kartapolov-i Hokulbarnü ashi.

Ukraine anema tactical nuclear weapons amshitsü ta Russia-i ashiba ya asayamenür masü aser West den raraba ya tuluba akumtsü, ta Russian security ketdangsür Dmitry Medvedev-ia ashi.

West den Moscow-i raraba ya tensa tamajungba kuma aor aser tatem tashi meraratsü ta shingia meshitet, ta Medvedev-i pa indang Telegram channel nung ashi.

Pei linük kumzüka ayutsü atema anüolen linük temi agütsüba nok-nü tem Ukraine-i amshitsü akok, ta Germany-ia Hokulbarnü shia liasü.

Russia arütsü anasa aliba tesemtem nungi Kharkiv region nung amakba indang tembar linük den Germany-i jembio, ta sorkar ketdangsür kati sangdong ka nung ashi.

"Item amakba anema pei linük kumzüka ayutsü asoshi international law nung Ukraine temeden aser guarantee lir ta onoki angatet. International ozüng nung mela aliba ama parnoki item nok-nü amshitettsü," ta ashi.

Ukraine Tir Volodymyr Zelenskyy-i par tembar linüktem dang parnok indang longer-range weaponry amshia Russia litsü nung targets tem amaktsü ajungshia arur.

Ukraine nung yimti tulutiba jenjang tanabuba nung aliba Kharkiv ya Russia arütsü nungi kilometre 30 (mile 19) dang pilar lir.

Iba yimti nung Brehostibar ayatirm nung Russia indang missile ka apartment block nung khaloktsüba nung nisung asem asü aser 16 yiru. Taoba hopta tatemlena Russia-i iba yimti nung hardware superstore ka amakdang nisung 19 asü.

2022 küm February ita nungi tashi ajak amshia amakba Russian sepaitem meyipa yoktsü atema Ukraine-i raraba nung nok-nü timba US-i agüja arur.

Kyiv-i nok-nü amshiba nung tenokdangba salatsü aser Ukraine nungeri asangsang nung par litsü kumzüka ayutsü mapang tongogo, ta NATO chief Jens Stoltenberg-i par alliance indang foreign minister tem dang shir ghonda ishika lir Biden-i iba telemtepa ya agi.

Washington-i maneni Ukraine nem ATACMS aser ano danga long-range US nok-nü tem amshia Russia linük telung nung amakba nokdangtsü, ta US ketdangsür temi ashir. ATACMS ya meta kilometre 300 (mile 186) tashi lir.

Kharkiv region nung amakba nung yaritsü atema Moscow-i Ukraine den arütsü anasa nungi missile launchers aser danga military sites tem amshir, aser Kharkiv nung glide bombs pokloktsütsü atema fighter aircraft amshia arur. Rara metenzükdang Kharkiv nung nisung million 1.5 liasü.

Russia-i Kharkiv region north tsütsü arütsü anasai regiments aser brigades tali yoker, ta Ukraine indang mitkar tanishir Oleksandr Syrskii-i Brehostibarnü shia liasü.

MULUNGEN O



Lt. L.N. Wati Walling
01/10/1950 – 25/05/2024

Onoki teti meima aliba Asür **L.N. Wati Walling (Khar)**, shirang yipden nung alidang nungi akümlü wadang tempang tashi nung kija, kibong, Arogo, medemer aser lokti balala shirnokisa ozü asükhu nung nübu, rongsen aser sarasadem agi yaritepogo, nenok ajak dang kanga pelar.

Onoki nenok nem meyipa kecha magütsütetaka nenok temeim mapatem kodanga mamatetsü. Tulusang Tsüngremi nenok taküm moajang ta ozü tamang sarasadem.

~ Temeim Kinungtsü, Jala, Jabasotem aser Kinungertem.

In Memory of
Lt. Mrs. K. Nungsangmongla Pongen
(MANGMETONG)
16.01.1941 - 25.05.2024

Onoki teti meima aliba asür K. Nungsangmongla Pongen asüba mapang nübu, sarasadem aser yimya balala ajanga ozü nungita yariba atema kibong balala, kinunger, tembar, Arogo, lokti tentet balala aser temulunger ajunga dang ozüü pelaba lemsateper. Ozüü nenok kija shia dang pelar ta meshitetba atema kanga sasar, saka asen Tulusang Tsüngremi nenok kija shia mulamoshia moatsütsü ozü sarasadem.

Nü takum ya temoatsü ka liasü, senti rongsen ama na bilemteter.
Na tebang agi meshiteti meimer aser asadangtsü mokoki menungrar.
Na asoshi meilemi nai meima alirtem asoshi nü takum litetba aser na müketa alir ajunga asoshi tepela aser temoatsü ka ama nai aliba atema kanga pelar.
Nü temeim, bendanga agütsüba aser dangar dang aria bilemba tatem maka.
Nü kidang memetetba nisungia temeim ngutet. Asangsang nung nai onok dang Kotak sayuogo.
Na bilemteta onoki akum agütsür
Aser na tatem makaba lima nung aliba onoki benjonger.
TATEM MAKA TESUNEP NUNG ANISÜNGZÜKANG.
Temeim jalatem, adianu, semchisemnur aser kinungertem

Jabalia nungi Israel sepaitem ainshio

Tel Aviv, Monupii/May 31 (Agencies): Israel sepaitem Gaza north tsütsü Jabalia tesem nungi ainshio, kong hopta asem raradang civilian meyirijang aika tesem balalai jena ao.

Iba yimti nung hopta asem operation agiba mapang kiralongrar noklang aika samatsüogo aser kilometre 10 (mile 6) junga longpok tem raksatsü, ta mitkari ashir.

Jabalia nung tangokba noksa tem nunga tesem ajungalen teraksa agi sünger lir, kong multi-storey buildings tem jana kumtsür mesüra bomb agi poksatsür liasü.

Ita ishika lir Israel Defense Forces (IDF) iba yimti yagi tanaben ao, kong Hamas telok tanaben adenshir ta shia liasü.

Iba yimti nung operation agiba mapang Hamas-i October 7 nü Israel amakdang tepseter Gaza-i bener aoba Israel nunger nisung tasümgang tenet nguteta bener arua liasü.

Hamas temi civilian tem aliba tesemtem fortified combat compound kumdaktsü, sheltered

areas aser school ki tem nungi sepai tsütsü injang-bomb khaloktsü aser civilian aliba ki telunglen underground terrorist network yanglua liasü ta IDF-i ashi.

Parnoki amshitsü renemer aliba rocket launchers tem aser nok-nü yangluba tesem aika raksatsü ta ashi.

Gaza north tsütsü Jabalia nung Hamas tashi raksatsüogo ta sangdonger ita pezü lir IDF ajanga iba yimti nung ground operation tanaben tenzüka liasü.

Iba rara ya tang anünga aliba küm tepiyong raratsü akok, ta Israel Ato Kilonser Benjamin Netanyahu den yariteper kati Bodhbarnü shia lir.

Kasa mapang Israel-i ozü nüburtem ajunga samatsütsü meranga tepsetba, amakba aser achiajemtsü ajak nokdanga lia yimjung ken o jembishinü masütsü ta Hamas-i Brehostibarnü ashiba ajanga ceasefire asoshi asendenshir jembishinütsü teimla kangabo mangur.

(Maneni tapak 8 nung...)

Capital Shuttlers Kohima-i coaching camp & doubles leagues ayongzüksü



Kohima, Monupii/May 31 (TYO): Capital Shuttlers, Kohima-i state nung badminton meimer aser temang anema alitsü janrar atema June ita sentong tulu ana ayongzüksü renemtar.

Indoor Badminton Stadium, Kohima nung Hokulbarnü osangbener den jembidang, tir Medokerhe Noho aser general secretary Joseph Sumi nati ashiba agi, parnoki Nagaland Badminton Association aser Kohima District Badminton Association tawabangba kübok June 20 nungi July 20, 2024 tashi Smash - "Nurture Them Young" - All Nagaland Summer Badminton Camp ayongzüksü aser iba sentong nung Department of Youth Resources and Sports, Government of Nagaland-i yaritsü.

Sumi ya asayar tejen ka aser state aser northeast level tournament aika nung takok ngua lir, aser pai ashiba agi,

Nagaland nung badminton tsütsü sempet tajung aketba asayar jenti lir saka coaching maongka manguba ajanga junga masayatetba ajiteta par teloki iba sentong ayongzüksü ya mulungtet.

Form ya June 10 tashinung agütsütsüla aser iba camp ya tetsür aser tebur atema lir, kong beginners, intermediate aser Under 10 years, Under 15 years, Juniors Boys/Girls, Men/Women/Veteran atema state players tem asoshi alitsü, ta pai ashi.

Capital Shuttlers nung züngsem Metekhrielie Mejura-i ashiba agi, iba coaching camp ya Josepg Sumi-i agitstü, shiba tebur State singles champions 15 ben bena lir, tebur North East singles champions 12 ben bena lir aser State doubles champion 20 ben bena lir. Sumi ya Badminton World Federation Level-1 certified coach lir.

Ano Capital Shuttlers ajanga

Men/Women/Mixed Doubles/Junior Boys/Girls/Mixed Doubles/ Veteran 75 aser 95+ atema All Nagaland Badminton Doubles League ayongzüksü, ta Sumi-i metetdaksü.

Iba atema form ya June 10 tashinung agütsütsüla.

Doubles league ya Hokulbar aser Honibar shia asayatsü aser coaching mapang den külemi alitsü, ta pai metetdaksü.

Coaching camp atema registration tenzükogo aser asayar shia sen 1500 aser kibong ka nungi nisung ana dak tema atema asayar shia sen 1000 agir, aser doubles league atema entry fee ya team shia sen 5000 alitsü.

Iba dak sendakba nung osangtsüsang tali tejangjaba metetneri Capital Shuttlers indang ketdangsurtem den mobile number 7005684949, 9436012801 aser 9856070271 ajanga tongtepratepsü akok.

Boxing Federation of India-i World Boxing nung adener



Ajay Singh, President Boxing Federation of India (left) aser Boris van der Vorst, President of World Boxing (right).

New Delhi, Monupii/May 31 (Agencies): Hokulbarnü Boxing Federation of India (BFI)-i tang suspend süa aliba IBA nungi pilaogo aser razüka aoba World Boxing nung denogo.

National federations temi maneni International Boxing Association (IBA) den sendaktepra 2028 Los Angeles Olympics nungi boxing masayadaksütsü ta International Olympic Committee ajanga nenshia shir ita ishka lir iba mera ya agir.

"Boxing ya Olympics jenjang

nung alitsü kanga tongtipang, anungji World Boxing nung adenba pelar," ta BFI tir Ajay Singh-i sangdong ka nung ashi.

Tarutsü nung iba asaya tajungba kuma renloktsü aser alima tesem balala nung aliba boxer nem tarutsü tia tajungba agütsütsü atema WB Executive Board den külemi inyaksü imla atar, ta Singh-i ashi.

World Boxing ya April 2023 nung tenzük aser Olympic movement nung boxing ya tongtipang shilem ka asütsü nükjidong lir, kong taoba IBA presidentiaol candidate Boris

van der Vorst ya tir lir.

Züngsem akumtsü atema application ya BFI indang General Assembly nung agizük aser World Boxing indang Executive Board ajanga jangjatepsü.

"International boxing nung India ya kanga tongtipang linük ka lir aser tang tuluba kuma ainba World Boxing kibong nung BFI pelashishia agizüksü imlar. Ibai osang kanga tajung lir aser iba ya ajanga Asia nung asenok aliba tali jangjatsü aser asen arok nükjidong ataloktsü atema BFI den külemi inyaksü imla atar," ta Van der Vorst-i ashi.

May 7 nü WB ya IOC den mezüngbuba senden mena liasü aser Olympic Games nung boxing ya alitsü asoshi lenmang yanglutsü atema lokti tentet ana lungjemer tezüka liasü.

Senotsü, sports integrity aser ketdangsuba ken o mechi IBA ya 2019 küm International Olympic Committee (IOC)-i de-recognise süa liasü.

2024 Paris Olympics nung boxing ya IOC ajanga ketdangsuba lir.

Tokyo Olympics nunga IBA-i shilem magi.

Singapore Open: Treesa Jolly aser Gayatri Gopichand na semi tongogo

Singapore, Monupii/May 31 (Agencies): Singapore Open quarterfinals nung takok angur den asayatsü. Iba asayamung tenzük Round of 16 nung India tsür ana yagi ghonda ka junga asayar Korea tsür World No. 2 nung alir Baek Na Ha aser Lee So Hee na 21-9, 14-21, 21-15 agi tsükdakja liasü.

Tang BWF Super 750 Badminton tournament nung India nung Treesa aser Gayatri ya dang anünga lir. Kasa asayamung tetsür kija asaya round tanabuba Bresthostibarnü asayadang India tsür PV Sindhu ya taoba mapang Olympic medallist Carolina Marin-i 21-13, 11-21, 20-22 agi tsükdaksü aser HS Prannoy ya Japan nung Kenta Nishimoto-i 21-13, 14-21, 21-15 agi tsükdakja liasü.

Tena ya Japan tsür Nami Matsuyama-Chiharu Shifa aser Indonesia tsür Apriyani Rahayu-Siti Fadia Silva Ramadhanti tsüngta Honibarnü tanabuba

quarterfinals nung takok angur den asayatsü.

Iba asayamung tenzük Round of 16 nung India tsür ana yagi ghonda ka junga asayar Korea tsür World No. 2 nung alir Baek Na Ha aser Lee So Hee na 21-9, 14-21, 21-15 agi tsükdakja liasü.

Tang BWF Super 750 Badminton tournament nung India nung Treesa aser Gayatri ya dang anünga lir.

Kasa asayamung tetsür kija asaya round tanabuba Bresthostibarnü asayadang India tsür PV Sindhu ya taoba mapang Olympic medallist Carolina Marin-i 21-13, 11-21, 20-22 agi tsükdaksü aser HS Prannoy ya Japan nung Kenta Nishimoto-i 21-13, 14-21, 21-15 agi tsükdakja liasü.

INDIA OSANG : Tapak 3 nungi...

India nung tali atsükba agi...

Director (Public Health), Dr Ravi Prakash Mathur-i, kanga tatsük süaka tang tashi nungbo tensa aziokteta lir aser March ita nungi medical aser health departments renema dang lir, ta metetdaksü.

"Tang tashi nung state nung tali atsükba agi nisung pongu süogo. Death Audit Committee-i india sorkar telatetba kübok tatsük agi asüba kuli bushisüngdang. Atangji tatsük agi asüba süra iba report ji Integrate Health Information (IHIP) portal nung agütsür. IHIP portal nung agütsüba osangji dang shidak," ta Mathur-i metetdaksü.

Jharkhand kübok Palamu district nunga tali atsükba agi nisung pezü süogo; Brihostibarnü state nung maximum temperature ji 47.4 degrees Celsius liasü.

Bihar nunga tali atsükba agi Brihostibarnü nisung 8 süogo; Brihostibarnü Bihar nung maximum temperature 44 degrees Celsius adena atu.

Bihar state disaster

management department-i, parnokji tatsük agi asü asü masüar tejangjabo masü, kechiyong asür kinüngertemi post-mortem agitsü memelunger, ta metetdaksü.

Bihar nung tali atsükba agi sorkari June 8 tashi nija aser sorkar schools ajak den coaching institutes aser Anganwadi centres shibangtsü tuyuogo. Brihostibarnü Bihar nung temperature teimtiba atuba district ji Buxar liasü (47.1 degree Celsius).

Madhya Pradesh kübok Gwalior nunga tali atsükba agi tanur ana süogo. Osangbener den jembidang CMHO, Dr RK Rajoriya-i, "Parnok meyipa aruba mapang nung temang nung timtem adok. Tanur kabo teshirangdak liasü aser temang meta-a liasü. Ano tanur kabo temang junga dang liasü saka timtem adokba sülen tenaprongla hospital-i anir ao saka hospital matongdang tenaprongla süadok," ta metetdaksü.

BENDANGLI OSANG : Tapak 7 nungi...

Jabalia nungi Israel sepaitem...

Israel-i rara anenba sülen ang "complete agreement" kati arutsü renema lir ta Hamas-i iba rara anentsü asoshi jembirtem dang ashi.

Israel-i par nükjidong ataloka Hamas mesamatsü tashi aser pua alirtem meyipa maru tashi raratsü ta ashir.

October ita Hamas telungpuri Israel litsü telungi aita nisung 1,200 tepseter nisung 252 pua bener aoba sülen rara ya tenzük.

Iba tayang kepzüka Israel-i amakdang Gaza nung nisung 36,000 dak tema tepsetogo, ta Hamas meyong health ministry ajanga ashir.

BILEMDANGANG
"Tashimait kaji, memerangdangi toktsüba ya lir."